

Saintis ternama Amerika bakal terajui NTU

SEORANG saintis terkemuka Amerika Syarikat yang dipilih mantan presiden Barack Obama untuk mengetuai Yayasan Sains Kebangsaan di Amerika, semalam dinamakan sebagai presiden keempat Universiti Teknologi Nanyang (NTU).



Foto SANDY SCHAEFFER

Profesor Subra Suresh, 61 tahun (*gambar*), yang akan mengambil alih jawatan presiden NTU, Bertil Andersson, pada 1 Januari depan, telah berkhidmat sebagai presiden Universiti Carnegie Mellon di Pittsburgh – institusi yang terkenal di peringkat antarabangsa bagi pendidikan dan penyelidikan dalam sains komputer dan kejuruteraan-nya.

Profesor Suresh dianggap sebagai saintis terkemuka di Amerika.

Beliau dipilih Encik Obama untuk berkhidmat sebagai pengarah Yayasan Sains Kebangsaan, agensi bertanggungjawab memajukan sains serta penyelidikan dan pendidikan kejuruteraan di negara itu antara 2010 dan 2013.

Pada 2013, beliau dipilih memasuki Akademi Perubatan Kebangsaan di Amerika.

Beliau juga ahli Akademi Sains Kebangsaan dan Akademi Kejuruteraan Kebangsaan, menjadikannya salah satu daripada hanya 19 saintis Amerika terpilih bagi tiga cawangan tersebut.

Profesor Suresh juga profesor kelahiran Asia pertama pernah berkhidmat sebagai dekan kejuruteraan Institut Teknologi Massachusetts (MIT), tempat beliau mendapat ijazah kedoktorannya dalam sains.